

四庫全書

集部

欽定四庫全書

集部

漢魏六朝百三集卷九十二

詳校官庶吉士臣謝恭銘

主事銜臣徐以坤覆勘

總校官檢討臣何思鈞

校對官編修臣沈清藻

謄錄監生臣李長清

欽定四庫全書

漢魏六朝百三家集卷九十二

王僧孺集題詞

南史言王僧孺中年遭躋有桑濮之疑而梁書
顧稱南康王興籤湯道愍怨僧孺裁抑彼寵遂
行謗訟余以其生平攷之出守南海不取越裝
入參大選杜絕請謁節槩若此豈不堪託色者
哉南史言非也致書何炯自明已意憂患之餘

文辭危惻子長流連於少卿文通叫號於建平
有同情乎僧孺書藏異本富埒沈任文用新事
人多未見今集中諸篇杼軸雲霞激越鐘管新
聲代變於此稱極文人不博不能致奇碩學之
効其班班者訪砭石謬譜事特豹半耳江侍中
少孤貧采薪而得貂蟬竟成休徵王中丞幼避
鹵簿墮溝後乃鳴騶清道二事相類虎鼠須臾
誠達觀者可付之東瞰西嶠秉電畫水乎

目錄

賦

賦體

表

吏部郎表

為臨川王讓太尉表

為南平王讓儀同表

為韋雍州致仕表

為南平王妃拜改封

謝厯表

牋

逮詣南司辭府牋

啟

謝除吏部郎啟

謝賜于阗利國所獻檳榔啟

謝齊竟陵王使撰衆書啟

為蕭監利求入學啟

答釋法雲啟

教

南海郡求士教

書

與何炯書

答江琰書

與陳居士書

序

詹事徐府君集序

臨海伏府君集序

碑

中寺碑

栖玄寺雲法師碑

墓誌銘

豫州墓誌銘

傳

太常敬子任府君傳

誄

從子永寧令誄

祭文

祭禹廟文

佛事文

禮佛唱導發願文

懺悔禮佛文

初夜文

樂府

朱鷺

鼓瑟曲有所思

白馬篇

古意

登高臺

湘夫人

詩

侍宴

又

落日登高

中川長望

贈顧倉曹

秋日愁居答孔主簿

至牛渚憶魏少英

寄何記室

忽不任愁聊示固遠

為何庫部舊姬擬蘼蕪之句

何生姬人有怨

為人傷近而不見

月夜詠陳南康新有所納

詠擣衣

與司馬治書同聞隣婦夜織

為人述夢

侍宴景陽樓

春日寄鄉友

夜愁示諸賓

送殷何兩記室

春閨怨

秋閨怨

詠寵姬

在王晉安酒席數韻

為人寵姬有怨

為姬人自傷

為人有贈

見貴者初迎盛姬聊為之詠

傷乞人

春思絕句

為徐僕射妓作

漢魏六朝百三家集卷九十二目錄

欽定四庫全書

漢魏六朝百三家集卷九十二

明 張溥 輯

王僧孺集

賦

賦體

雜沓兮翠旌容與兮龍駕
新桐兮始華孔雀兮初化
思治兮終朝求人兮仄夜
竟大德之未酬何飛光之徒舍

表

吏部郎表

臣生輕飛籜品細疏壤寂寞州閭取淪塞竇不自求於
善管寧許人以能官從班隨牒自安疎遠豈望翰飛終
知跡滯一逢浸漉幾聞昭晉假拙為心變竒成偶寧為
天覆地長復與雨露相滋秋成春發必如暄寒無爽自
變泥塗多超嵩鄧屢考固其比越在累誠於可聞方愧
朱紫永情鈞衡固惟許李終非王畢取其清尚同所經

企求之碎密寧可庶幾

為臨川王讓太尉表

臣聞一匹以長望千里而成累空輪易聘觸三尺而不
登苟曰違方難用適遠安車駟馬望高闕而朝至繡服
緹麾輜康衢而暮返行瞻畫虎居對蒼龍陛下海涵春
育日鏡雲伸追大道之無私惜微臣之宜極

為南平王讓儀同表

臣聞石瓠難剖用謝銍罍疵木云疵事乖丹雘逢聖傲

天一朝賞至非能聲均吳楚譽埒梁陳故以神夢紫霄
心飛丹掖品同儀比愧眩莫殊

為韋雍州致仕表

一旦攀附遂無涯限排雲矯漢飛捧待翼陸離蟬組照
灼旛旗受脤推轂執珪奉酎變狹室於高門改小冠於
侯服况復還周紐其六印歸齊列其五鼎常懼輪輕載
積基薄墉高器覆卮傾人指鬼瞰老與年并疾隨衰及
途遙齒截漏迫鐘鳴高春之景一斜不周之風忽至菌

蟋夕陰倏駛無幾堇薜朝采飄零已及仰朱闕而掩涕
俯濛谷而自悲豈復式瞻拱默仰接鐘鼓僅惟葢未親
東岳稍駐擊壤鼓腹其賜猶多

為南平王妃拜改封表

拜妾為南平王妃奉命震慙有灼丹寸妾瞻絲望悅且
或多慙鏡史觀圖是焉知愧以茲眇薄有儷蕃儀紉組
不聞饘醕葢闕不悟玄造曲被徽渥愈臻改服遞名事
華品貴恩深外郎榮照下庭豈期輔弱所能勝荷

謝歷表

竊以龍馭不爽靡見侵薄鳳職是司曾無昃眊壁聯珠
燦輪映階平義實明時事惟均政固以先天候其餘始
執杓驗其平分九瀛仰化萬寓依朔

牋

逮詣南司辭府牋

下官不能避溺山隅而正冠李下既貽疵辱方致徽繩
解錄收簪且歸初服竊以董生偉器止相驕王賈子上

才爰傳卑主下官生年有值謬仰清塵假翼西雍竊步
東閣多慙衽服取亂長裾高榻相望直居坐右長階如
畫獨在僚端借其從容之詞假以寬和之色恩禮遠過
申白榮望多厠應徐厚德難逢小人易說方謂離腸隕
首不足以報一言露膽披誠何能以酬屢顧寧謂尉羅
裁舉微禽先落閭闔始吹細草仍墜一辭九畹方去五
雲縱天網是漏聖恩可恃亦復孰寄心骸何施眉目方
當橫潭亂海就魚鼈而為羣披榛捫樹從虺虺而相伍

豈復仰聽金聲式瞻玉色顧步高軒悲如霰委跼蹐下
席淚若縷縈

啟

謝除吏部郎啟

自一遇休明多逢渥澤出斯溝壑置之霄漢清塗華轍
叨厠累仍顯職名階俄來脩至而智効必其無取尤怠
忽焉已彰不意涵養更滋霽霽愈此始職樞華紛體恒
選知非腴族必待俊民何言賤劣所或叨假循涯測限

生所不勝瞻恩奉德死何能報

謝賜于阗國所獻檳榔啟

竊以文軌一覃充仞斯及入侍請朔航海梯山獻琛奉貢充庖盈府故其取題任賦多述俞書萍實非甘荔葩慙美

謝齊竟陵王使撰衆書啟

伏惟殿下銅爵始成早摛從后之句柏梁初構首屬驂駕之辭楚史所受曾不云述沛獻斯陳良未足採徒以

願托後車以望西園之客攝齊下坐有綵南皮之游謬服同於魯儒竊吹等乎齊樂

為蕭監利求入學啟

竊以矯首伺飛不如脩弋踈足念遠莫若驅鑣故撲斲成於丹腹篠蕩資於枯羽敢因葶末有志庠均為山資於一簣學海漸其微流

答釋法雲啟

辱告惠示并主上所答羣臣仰諮神臧論伏覽循環載

深鑽奉發蒙祛蔽朗若披雲竊以事蘊難形非聖莫闡
理寂區位在愚成惑若非神超繫表思越機前豈能燭
此微言若開金石洞茲妙境曾靡榛蹊喻之以必薦示
之以如在使夫持論者不終泥於遙轍專謬者無永沈
於惑海預奉淵鑒孰不懽肅裁此酬白不申擊舞王僧
孺呈

教

南海郡求士教

文舉下車寤夢於根矩長孫入境明發於龍丘此境三
閩奧壤百越舊都漢開吳別分星畫部風序泱泱衣簪
斯盛其川岳所產豈直明珠大貝桂蠹翠羽而已哉孝
實人經則有羅威唐頌學惟業本又聞陳元士燮至於
高尚獨往相望於嵎巖懷仁抱義繼蹤於前史

書

與何炯書

近別之後將隔暄寒思子為勞未能忘弭昔季叟入秦

梁生適越猶懷悵恨且或吟謠况岐路之日將離嚴網
辭無可憐罪有不測蓋畫地刻木昔人所惡叢棘既累
於何可聞所以握手戀戀離別珍重弟愛同鄒季淫淫
承睫吾猶復抗手分背羞學婦人素鍾肇節金甌戒序
起居無恙動靜履宜子雲筆札元瑜書記信用既然可
樂為甚且使目明能祛首疾甚善甚善吾無昔人之才
而有其病癩眩屢動消渴頻增委化任期故不復呼醫
飲藥但恨一旦離大辱蹈明科去皎皎而非自汙抱鬱

結而無誰告丁年蓄積與此銷亡徒竊高價厚名橫叨
公器人爵智能無所報筋力未之酬所以悲至撫膺泣
盡而繼之以血顧惟不肖文質無所底蓋困於衣食迫
於饑寒依隱易農所志不過鍾庾久為尺板斗食之吏
以從皂衣黑綬之役非有奇才絕學雄略高謨吐一言
可以匡俗振民動一議可以固邦興國全璧歸趙飛矢
救燕偃息藩魏甘卧安郢腦日逐髓月支擁十萬而橫
行提五千而深入將使執圭裂壤功勒景鐘錦繡為衣

朱丹被穀斯大丈夫之志非吾曹之所能及已直以章
句小才蟲篆末藝含吐絢縹之上翩躚鐔俎之側委曲
同之鍼縷繁碎譬之米鹽孰致顯榮何能至到加性疎
澁拙於進取未嘗去來許史遨遊梁竇俛首脅肩先意
承旨是以三葉靡邁不與運并十年未徙孰非能薄及
除舊布新清晷方旦抱樂銜圖訟謳有主而猶限一吏
於岑石隔千里於泉亭不得奉板中涓預衣裳之會提
戈後勁厠龍豹之謀及其投劾歸來思均舊隸升文石

登玉陛一見而降顏色再覩而接話言非藉左右之容
無勞羣公之助又非同席共研之夙逢筭餌卮酒之早
識一旦陪武帳仰文陛備聃佚之柱下充嚴朱之席上
入班九棘出專千里據操撮之雄官參人倫之顯職雖
古之爵人不次取士無名未有躡景追風奔驟之若此
者也蓋基薄牆高塗遙力躋傾履必然顛匍可俟竟以
福過災生人指鬼瞰將均宥器有驗傾卮是以不能早
從曲影遂乃取疑邪徑故司隸懔懔思得應弦譬縣厨

之獸如離繳之鳥將充庖鼎以餌鷹鷂雖事異鑽皮文
非刺骨猶復因茲舌杪成此筆端上可以投畀北方次
可以論輸左校變為丹赭充彼春薪幸聖主留善貸之
德紆好生之施解網祝禽下車泣罪愍茲恚詒憐其觥
釁加肉朽齒布葉枯株輟薪止火得不銷爛所謂還魂
斗極追氣泰山止復除名為民幅巾家巷此五十年之
後人君之賜焉木石感陰陽犬馬識厚薄員首方足孰
不戴天而竊自有悲者蓋士無賢不肖在朝見嫉女無

美惡入宮見妬家貧無苞苴可以事朋類惡其鄉原耻
彼戚施何以從人何以狗物外無奔走之友內乏強近
之親是以構市之徒隨相媒藥及一朝捐棄以快怨者
之心呼悲可矣蓋先貴後賤古富今貧季倫所以發此
哀音雍門所以和其悲曲又迫以嚴秋殺氣具物多悲
長夜展轉百憂俱至况復霜銷草色風搖樹影寒蟲夕
叫合輕重而同悲秋葉晚傷雜黃紫而俱墜蜘蛛絡幕
熠燿爭飛故無車轍馬聲何聞鳴雞吠犬俛眉事妻子

舉手謝賓遊方與飛走為隣永用蓬蒿自沒慊其長息
忽不覺生之為重素無一廛之田而有數口之累豈曰
飽而不食方當長為傭保糊口寄身溘死溝渠以實螻
蟻悲夫豈復得與二三士友抱接膝之歡履足差肩攜
綺縠之清文談希微之道德唯吳馮之遇夏馥范甌之
值孔嵩愍其留賃憐此行乞耳儻不以垢累時存寸札
則雖先犬馬猶松喬焉去矣何生高樹芳烈裁書代面
筆淚俱下

卷九十二
答江琰書

猥惠嘉音用蠲疾首發函伸紙朗若披雲等嶰谷之清
音比洞庭之高曲辭則美矣而擬其非倫譬享海鳥以
醇醪嘉膳栖林狔以崇楹曾拱苟非其實立有驚怖况
復以一離訴棄賓實灌然豈復能使一筭可輕八厨斯
引且登清漢乍棄黃汗望影析支爭塗再揖其或蹲林
卧石籍卉班荆不過田畷野老漁父樵客酌醴焚枯鳴
鳴相勞美藜含糗果然滿腹寧有幡旗貴客車馬大賓

獻書盡先賢之德作頌罄前皇之美豈不俯拾青紫坐
享大夫况復詠高梧而賦脩竹背清淮而遊長苑留東
閣以從容登石室而高視豈與夫身沒名隕同年而共
毀譽哉

與陳居士書

雲波遙賈燕越數千行雲鬱術征禽難使用隔巾車未
能捫札引領南望悵矣心飛幸因劣薄懷章貴壤依然
谷口覺子真之咫尺靜睇巖灘信子陵之非遠已入虛

白之室用披蓬蒿之徑粟紛綸之高論承希微之妙旨
虛往實歸用祛塵惑

序

詹事徐府君集序

君稟靈川岳懸精辰象早照珪璋夙表岐嶷孝睦天稟
友愛冥深故以事顯家庭聲著同族年十八見召為國
子生曳裾持卷實華庠壁有均閑戶靡因餘竈每攝齊
函丈左右屬目蓄以鄰幾之性加以入神之資聞一知

二師逸功倍遊魏闕而不殊江海入朝廷而靡異山林
未嘗投刺權門驅車戚里遨遊梁董去來賈郭時春秋
猶少人爵未崇而清風嘉譽震灼朝野非直俯致貴仕
故可坐享通侯而縶馬懸車閉門高枕耻為詭遇試此
行藏及皇運聿興重氛載廓君藏器待時合猶符郭陵
扶搖而高驚排闥闔而容與故位隨德顯任與事隆重
以姿儀端潤趨眄淹華寶佩鳴風豐貂映日從容帷扃
綽有餘輝自綢繆軒陛十有餘載溫樹靡荅露事不訓

省中之言無漏席下之迹不疑故以主聖臣賢應同壻
璽以石投水如鱗縱壑行稱表綴言成模楷猶復忘彼
豐愉安茲素薄衣同屢補食等三杯車服不事鮮明室
宇畏其雕與九德無遺百行備舉至於專心六典精賸
必深沉遊羣籍菁華無棄擗札含毫必弘靡麗摘綺縠
之思鬱風霞之情質不傷文麗而有體

臨海伏府君集序

束縈領袖一時儀形物右聲逾衆樂譽出王劉士有懷

道蘊義望塵而趨者或三年而未識乍四旬而一見與
君道合神遇投分披衿數文研理匪晨伊暮至於神經
怪牒綠笥丹筒金版玉箱錦文緹帙並藏諸靈府秘在
瑤臺而君莫不徧探冥蹟具閱局檢常以前賢往學亟
與聖違賈馬盧鄭非無紕越荀郭何王彌多踏謬二義
可辨未值高卿之疑九事非難不逢平叔之問其詩賦
銘誄所作猶多

碑

中寺碑

夫玉律追天故躔次之期不變緹室候景則發歛之氣
罔踰是以忘言種覺絕累於後心寄像聲形啟機於前
教兼真假之雙燭均空有而兩忘蘊三明而過十地圓
萬行而包四等道周百億化起大千獎導羣有滋濡萬
類是用發廣大心吐微妙理將同商主取喻醫王開方
便門示真實相固以濯之慈水銷以慧刀永言六趣用
均一子中寺者晉太元五年會稽王司馬道子之所立

也斜出旗亭事非湫隘傍起壁水望異狹斜天監十五年上坐僧慈等更揆日禘架赫然霞立信以填金可埒引繩斯擬寫妙金樓模麗瓊閣宮堯偃蹇故三休而可至穹窿周流方中宿而斯盡萬楹百拱合沓相持繡栝玉題分光爭映燭龍夭矯將舉復還威鳳鏗鏘如鳴更戢旁攀鏤檻斜登鈿砌煜爚金鋪玲瓏綺構無風自響不沸而淨耽耽肅肅信息心之勝地穆穆惜惜固忘想之嘉所銘曰

玄黃雖弭權輿未測生滅相輪成壞不極篋虵爭赴藤
鼠無息情塵莫捨心火方赫是用三明實開五力湛寂
無方示現多所跼蹐吉樹殷勤禪渚斯道誰匡蒸哉我
王施踰寶鉢供等檀牀蕭宮改構梵宇方壯階飛瑞采
地起泥香日流閃爍風度清鏘道踰厥極固與天長

栖玄寺雲法師碑

渺渺大家茫茫真樸多淪愛有莫辯塵洲猗歟息心言
高理邈居之匪絢得之靡學刻情幾種厲想玄覺且說

且定以披以握來遵北渚至依西岳西岳峩峩北渚迴
波庭棲弱羽簷挂輕蘿甘羶衣惡棄厚安薄滅意囂湫
寄心寥廓

墓誌銘

豫州墓誌銘

自姬發系因魏傳緒留路在趙名賢世襲相秦將漢英
雄係踵忘寵辱無愠喜靡矜夸慎嗜欲其行軍用武動
合奇正乃治邊御衆威裕兼行常懔懔然以中原為已

任或欲十萬而橫行乍思五千而深入尅反舊京飲馬
函渭然後高卧閒帷晤言空谷思魯連之辭賞慕田疇
之高蹈而火傳川逝長途已迫雖景鐘良史有功必書
刻板鏤石宜兼不朽銘曰

高勲藹藹長旌高旆入作爪牙出司襟帶民謠不息王
言有會功為上等政稱九最日隆寵秩方登遠大義轡
難留濛水易收秘丘玄戶杳杳悠悠

傳

太常敬子任府君傳

耻一物之不知惜寸陰之徒靡下帷閉戶投斧懸梁雖
玄晏書淫文勝經溢康成之忽忘所往公叔之顛墜硯
岸無以異也若夫天才卓爾動稱絕妙辭賦極其精深
筆記尤盡典實若聞金石似注河海少孺速而未工長
卿工而未速孟堅辭不逮理平子意不及文孔璋傷於
健仲宣病於弱其有集論借書窮文質之敏駐馬停信
極疊疊之功莫尚於斯焉君職等曹張聲高左陸時乃

高闕雪宮廣開雲殿秋窓春戶冬燠夏清九醞斯浮百
羞並薦雲銷月朗聿茲遊客朋來旅見辭人才子辯圃
學林莫不含毫咀思爭高競敏乃整袂端襟翰飛紙落
豪人貴仕先達後進莫不心服貌慚神氣將殫顧余不
敏廁夫君子之末可稱冥契是為神交二三君子唯以
從游日暮亭號昭仁庶子雲咫尺康成斯在借此嘉言
將無絕乎千載

誄

從子永寧令誄

余之從子謙字幼光以昭陽紀歲誕賓旅月啟足閩喁
瞑目泉岫是殲才子實喪俊民若其孝親睦友故非天
墮地出異才絕學如有鬼告神授玉懷瑕而可指桂含
蠹其取傷孰與九德彰於造次百行動為表徵一作綴吐

論含毫宣赴鍾琯標心用已懸符矩矱惠響棲道清心
可鏡和而靡屈簡而周爽邃若凝雲潔如止水無慙座
右不愧屋漏蒼苔繞路素塵滿席蕭索庭戶靡事鮮明

沉淪典籍將絕弔賀室如夏甫狀等安期所有清塵唯
不能忘懷藝而已斯美宜久宜長而驥騄之步中徂鸞
驚之翅未矯一歸寥廓長反虛無雖東隅再暝鉗丙之
御無及北顧相望隸首之數不盡而怛化非常人所不
免况風雲萬里間此山川客思故鄉次房之念何極輕
棺反蜀允南之思可知而魂兮渺渺扁舟靡靡生人之
望已冥死歸之期又阻痛心傷目豈伊一事無以少寄
辛傷故復誅之云爾

昭昭洪胄映策光書違羸避項從衛遷徐基忠踐孝抱
約懷虛有顯而默匪屈伊舒如茲邴魏譬彼董踈入登
高闕出啟精廬瞻星畫野望閭推車履仁不匱蹈道有
餘九世盛矣七葉光諸徃弼睿主來傳英儲峨峨三祖
羅室並居前瞻紫闕傍望白渠高軒霞被四馬龍攬溫
溫司武皎皎秘書義高松竹價重璫璵元昆世父重規
疊矩容與學丘徘徊詞府青紫已拾大夫斯取盛藩徃
相名畿來撫暉光不已驚生之子謏謏萬尋昂昂千里

實鳳匪雜真龍非似均情遽寧得意莊李室有虛白門
無囂滓遺心沮勸忘懷愠喜貧靡斯攝富其無耻險而
不峭方而能理德有潤身學斯為已逸羽難集孤峰易
峙南邁瑤琨西踰杞梓人亦有言名為實使譽傾邦國
價騫州里崇蘭自芳珏玉自光汪汪巨壑曖曖重牆靡
造靡請不迎不將久而愈敬狎而愈莊即無矯資此有
循常默非蓄短顯弗用長豈伊墜岸如彼懸梁唯學已
聚待問則強偏在三篋兼下五行亦稅其中于彼王吏

之域故欲洗拔萬有度脫羣生濯淨水於寶池蔭高枝
於道樹折伏攝受之仁遇緣而成拯苦言軟語之德有
感而斯唱日用不知利益莫限衆等相與增到奉逮至
尊五體歸敬禮

云

仰願皇帝陛下至道與四時並

運玄風與八埏共廣反淳源於三古捨澆波於九代至
治已覩於今日大道復屬於此時虎豹蹈而不驚虺蛇
踰而莫噬埋金抵玉毀契焚文嘉禾生醴泉出金車玉
馬自相暉曜玄鶴丹鳳飛鳴來往光景之所照燭亦車

之所驅汎若不屈膝係頸迴首革音入侍棠街迎拜渭
水與天地而長久等金石而逾固中岳可轉長河有清
而我聖皇愈溫愈晬不言而化行無為而教肅

夫道備監撫望表元良察遠知微貫宗勾極不勞斧藻
無待審諭况復靜悟空有同觀貞俗能行能說既信既
持衆等齊誠奉逮儲君殿下歸命敬禮

云

仰願皇太

子殿下厚德體於蒼莽廣載侔於磅礴前星照耀東離
煥炳淑聞自遠和氣熏天異才爭入端人並至玉體怡

清金聲妙越

夫茂實英聲道周德廣秉珪襲衮之貴坐槐憩棠之尊
猶應共惜東暉俱吞西嶠悟蕉蘆之非實知鏡月之虛
銜信秉電之不留鑒畫水之隨合惟宜照之智炬灌以
寶瀾增此睿根成斯妙植又各增到奉逮太尉等諸王
殿下歸命敬禮

云

云

仰願諸王既明且哲聲跨於河楚

令聞令望道均於旦奭德貫右戚義藹周親作鉉則與
二曜相終臨岳則與四維等固若彭涓之遐永譬松筠

之貞悅

夫天枝峻密帝葉英芬莫不玉震蘭搖金鏘桂繹觀寸
文而驗錦觀一毛而測鳳並能才高銅爵詞富雲臺彬
彬疊疊超超灼灼以斯勝善奉逮諸王殿下歸命敬禮

云

云 仰願諸王殿下穆穆與清風並扇英英將白雲共

朗永鍾清祉長享元吉出牧則聲高民上入朝則譽光
物右德重山王智超海藏鏗鏘麗於珠樹皎鏡光於玉

田

夫道流雲幄德感椒闈必以前藉勝因宿稟嘉數况重
霑法雨更披慧日雖異姜后解珥請罪於周王不待樊
姬捨肉有激於荆后而遵恭儉去嗜欲拚彫璣撤靡麗
了心不滯正見無疑衆等齊誠奉為六宮眷屬歸命敬
禮

云

云願六宮眷屬業華姬日聲麗嫵辰震彩鐫圖傳

芳詩史位齊寶印行等月光具六神通得四無礙

夫稟閒明之德懷深妙之心豈非脩習有本故能依止
無倦義興等諸公主忘斯華重甘此翹到並宿世之所

記別故現前所以信了影響至真寤寐玄極人各增到
仰為諸公主歸命敬禮

云

云

願諸公主日增智性彌長

慧根四攝四依已遵已蹈七善七定靡退靡輟盛此王
姬光茲帝女長享湯沐與河山而同固永服緹綺貫寒
暑而無窮

夫三相雷奔八苦電激或方火宅乍擬駛河故以尺波
寸景大力所不能駐月御日車雄才莫之能遏其間飲
苦餐毒抱痛銜悲身口為十使所由意思乃八疵之主

衆等相與彼我齊到懺悔業纏無始已來至於今日所
為十惡自作教他見善不讚聞惡隨善焚林涸澤走犬
揚鷹窮鄭衛之響極甘旨之味戲笑為惡倏忽成非侮
慢形像陵踐塔寺不敬方等毀離和合自定權衡棄他
斗斛愧心負理昧主欺親雖七尺非他方寸在我而能
性其情在人未易恣此心口衆罪所集各運丹懇五體
自投歸命敬禮云願現前衆等身口清淨行願具足
消三障業朗三達智五眼六通得意自在

懺悔禮佛文

夫有非自有有取所以有無非自無無著所以無故有
取之惑興修成萬累無著之念起一超九劫是知道之
所貴空有兼忘行之所重真假雙照稟氣含靈莫聞斯
本肖形賦影靡測由來故發茲識窟猶綿蒙其莫辨導
此愚相尚窈冥而未悟茫茫有同暗海幽幽實在危城
業風縈薄三有長驚惑水遭迴二死相屬以苦捨苦從
暗入暗尋本不離色心即事莫非生滅是用抱此纏蓋

輪迴生滅恣其六愛興其八邪或徂詐而克昌乍仁義
而溘死或才均智等此賤彼豪或共日並時人升我墜
唯言報施寂寥不知因對皎徹曩緣今果過現殖成有
如符契不謬毫髮而欲以促生運其長術浮命迴其冥
數當知刹那交謝瞬息不留東搏纔吐西崦已仄譬閱
川之駛流若栖葉之輕露偽城易弛毒樹自攻若非假
實兩明真俗俱辨豈能寫誠迴向刻意脩習不退不沒
愈堅愈固南平大王殿下含辰象之正氣畜海嶽之淳

靈宿侍八恒早遊七覺藉妙因於永劫招勝果於茲地
若真金之愈鑒美玉之載琢是用未積已散不藏而捨
故今式招靈指仰屈神儀建此齊肅譬茲闕捷盛來緇
素濟濟洋洋名香遍室寶華覆地高梵宛轉寧止震木
過雲清桴遙奕非直騰魚御馬仰願四部至誠五體歸
命東方云願大王殿下五畏內遣十力外扶百福莊
嚴萬祉周集愕夢無忤其慮甘寢有恬其神更開寶衡
愈興慧業

夫玄極凝淡非學者所窺妙本難思豈恒人能測是以
十地云觀有羅穀之疑三乘見稱懷狂羊之惑自非鑒
窮機覺照極冥虛窮理盡性體元含一安能濟世仁壽
拯物貼危道包碧海聲高赤縣昔堯曜唯在即世舜黑
不兼來果四巡疲於禹迹六事倦於湯身並域中之勤
勞方內之成益豈有度元元於苦海拔冗冗於畏途運
神刀震法吼究香城之妙理窮金河之奧說慧高龍樹
智出馬鳴必欲洗濯臣民獎導緇白天覆地養水產陸

生成降慈悲蒙平等奉為皇帝陛下儲君太子歸命

敬禮

云

仰願皇帝陛下景祚與七政相齊皇基與二

曜均永地平天成樂和禮洽玉燭道正氛氤無爽條風

祥雨膏潤相屬却馬偃伯鑄戟銷戈南泊北臨西被東

漸灑甘雨布慧雲唯繩可結在冠已盡唐哉皇哉為導

為首又願皇太子殿下睿業清暉與貞明而並燭粹範

溫儀從嵩霍而俱峻聲出姬誦道越漢莊永沐智水長

照慧日上妙居身至仁在已自雙樹八枝潛光匿曜寶

城不關慧扇方掩而聖后驚法輪於長路棹寶舟於遙
壑道浹人祇福隆桃墀肅事園寢虔奉宗祏藉斯妙果
奉逮七廟聖靈歸命敬禮云仰願重明累聖儼然如
在騰神淨國總駕天宮託化金葉遨遊寶殿

夫誠心內惻則至覺如在形力外殫則法身咫尺步衆等
相與增到為諸王兄弟妃主戚屬歸命敬禮云願諸

王殿下裂壤盛於諸姬磐石過於隆漢德高魯衛義重
間平論道則百辟依風作翰則羣黎仰化弘闡至教紹

隆季像第內少長並膺此多福若百華之春麗譬萬寶之秋成信解堅深翹向無怠

夫小乘志劣事唯一已大士意均乃包六趣今日擅主信等明珠無勞傍鏡質同挺玉不待外光常欲物我均心怨親等觀衆等各歸誠為二十八天王釋梵人間貧病地獄辛楚敬禮尊儀靈像菩提寶塔云大乘奧藏妙法深經大身無邊身大力無量力四向四果八賢八聖願六氣氛氤四序熙穆至治光萬宇玄化洞九幽

襲介披鱗濕生卵化八苦六窮三塗五道俱蒙惠利並
識遵依刀林輟刃劍樹搖險迷域開道直指四衢閭室
生明大啟三曜俱向道場同登種覺

初夜文

夫遠自無始至於有身生死輪驚塵轢莫之比明暗遞
來薪火不能譬逝水非駛千月難保蓼蟲習苦桂蠹喜
甘大睡劇於據梧長昏甚於枕麴義非他召事實已招
曾不知稟此形骸所由而至將斯心識竟欲何歸唯以

勢位相高爭驕華於一旦車徒自盛競馳驚於當年莫
不恃其雄心壯齒紅顏緇髮口恣肥醲身安輕靡繁絃
促柱極滔湮而不厭玉牀象席窮靡曼而無已謂悲泉
若木出沒曾不關人蹲鳥顧兔升落常自在彼殊不知
命均脆草身為苦噐何異犬羊之趣屠肆麋鹿之入膳
厨秋蛾拂燄而不疑春蠶縈絲而靡悟未辨先對不識
因習及其一觸畏途益門非險輟裂肢解方斯不臻其
痛斷趾鑿肩比茲未極其苦輪迴起伏杳杳悠悠是以

天中之天降悲提引壅夏河之長瀉撲秋原之猛燎或
同商主乍等醫王形遍三千教傳百億或恣其神力或
寂諸梵境言則三塗離苦笑則四生受樂乃應病投機
解紛說理制之日夜稱為八闕以八正鑰為法關捷斯
實出世之妙津在家之雄行衆等相與運誠奉逮南平
王殿下歸命敬禮云仰願大王殿下睿業清暉與南
嶽而相固貞心峻節等東溟而共廣萬累烟消百災霧
滅巧幻所不惑彊魔莫能嬈遂憐舒而適體隨暄涼而

得性自稟儀天之氣永固膳衛之道得六神通力具四
無礙智夫日在昆吾則慮繁事擾景落濛汜則神靜志
怡璧月珠星含華相照輕雲薄霧朗然自戢鳴鐘浮響
光燈吐輝法幢卷舒拂高軒而徐薄名香郁馥出重檐
而輕轉金表含映珠柱洞色況復天尊端巍威光四照
煥發青蓮容與珂雪覺祇衛之咫尺若林園之斯在大
招離垢之賓廣集應真之侶清楚含吐一唱三嘆密義
抑揚連環不輟南平王體得機之敏資入神之微抱德

含和經仁緯義善無細而不窮累有輕而必捨受同虛
籥照如懸鏡忘魯衛之尊高略拊莩之華重建希有之
勝席臨難遇之法場相與五體歸命敬禮云仰願大
王殿下不二門登一相道德階不動智超遠行洋溢
惠聲與八風而共遠優游玉體等六律而相調餐雪山
之良藥挹露城之甘味袞服璫珪與四時而永久朱輪
緹幟貫千祀而常然

樂府

朱鷺

因風弄玉水映日上金堤猶持畏羅繖未得異鳬鷺聞
君愛白雉兼因重碧雞未能聲似鳳聊變色如珪願識
昆明路乘流飲復棲

鼓瑟曲有所思

夜風吹熠燿朝光照昔耶

昔耶瓦松也一作辟邪

幾銷縈蕪葉空

落蒲桃

一作葡萄

花不堪長織素誰能獨浣沙光陰復何極

望促反成賒知君自蕩子奈妾亦倡家

白馬篇

千里生冀北玉鞘黃金勒散蹄去無已搖頭意相得豪
氣發西山雄風擅東國飛鞚出秦隴長驅繞岷棘承謨
若有神稟筭良不惑澗汨河水黃參差嶂雲黑安能對
兒女垂帷弄毫墨兼弱不稱雄後得方為特此心亦何
已君恩良未塞不許誇天山何由報皇德

古意

青絲控燕馬紫艾飾吳刀朝風吹錦帶落日映珠袍陸

離闕右客照耀山西豪雖非學詭遇終是任逢遭人生
會有死得處如鴻毛寧能偶雞鶩寂寞隱蓬蒿

登高臺

試出金華殿聊登銅雀臺九路平如掌

一作砥

千門洞已

開軒車映日過簫管逐風來若非邯鄲美便是洛陽才

湘夫人

桂棟承薜帷眇眇川之湄白蘋徒可望綠芷竟空滋日
暮思公子銜意嘿無辭

詩

侍宴

麗景屬春餘，清陰澄夏首。
交枝隱脩逕，迴流影遙阜。
徙帷輾輕筠，移鑾拂高柳。
去矣勞茂績，勉哉報嘉誘。
小臣良不才，涓塵愧所守。
何用勝雕斲，譬木良如朽。

又

迴輿避暑宮，下輦迎風館。
散漫輕烟轉，霏微商雲散。
蔓草亘巖垂，高枝起天半。
回風稍驚水，落光漸斜岸。
妙儻

駐行雲清歌入層漢
睟顏暢有懌德音良已繁

落日登高

憑高且一望目極不能捨
東北指青門西南見白社
軫軫河梁上紛紛渭橋下
爭利亦爭名驅車復驅馬
寧訪蓬蒿人誰憐寂寞者

中川長望

長川杳難即四望四無極
安流寧可值憤風方未息
危帆渡中懸孤光巖下晃
岸際樹難辨雲中鳥易識
莫恨

東復西誰知迂且直故鄉相思者當春愛顏色獨寫千
行淚誰同萬里憶

贈顧倉曹

洛陽十二門樓闕似西崑曖曖呆愚下相望隔畫垣畫
垣向阿閣棲鳳復棲鴛五曹均趨奏六尚等便煩朝爐
何馥馥夜錦有餘溫日中驅上駟驤首遍京宛晨趨魏
公子夕宿韓王孫夙昔今何在生平棄不論譬如菴苑
草心謝葉空存誰復三乘賧獨念九飛魂

秋日愁居答孔主簿

首秋雲物善晝暑旦猶清日華隨水汎樹影逐風輕依
簾野馬合當戶昔耶生物我一無際人鳥不相驚儻過
北山北聊訪法高卿

至牛渚憶魏少英

楓林暖似畫沙岸淨如掃空籠望懸石回斜見危島綠
草閑遊蜂青葭集輕鵠徘徊洞初月浸滌瀆春潦非願
歲物華徒用風光好

寄何記室

思君不得見望望獨長嗟
夜風入寒水晚露拂秋花
何由假日御暫得寄風車

忽不任愁聊示固遠

去秋客舊吳今春投故越
淚逐東歸水心挂西斜月
未應歲貶顏直以憂殘髮

為何庫部舊姬擬藤蕪之句

出戶望蘭薰
褰簾正逢君
飲容裁一訪
新知詎可聞
新

人含笑近故人含淚隱妾意在寒松君心逐朝槿

何生姬人有怨

寒樹棲羈雌月映風復吹
逐臣與棄妾零落心可知
寶琴徒七絃蘭燈空百枝
顰容不足效啼妝拭復垂
同衾成楚越異國非仳離

為人傷近而不見

羸女鳳凰樓漢姬栢梁殿
詎勝仙將死音容猶可見
我有一心人同鄉不異縣
異縣不成隔同鄉更胾胾

如牛女何由得一語

月夜詠陳南康新有所納

二八人如花三五月如鏡開簾一種色當戶兩相映重
價出秦韓高名入燕鄭十城屢請易千金幾爭聘君意
自能專妾心本無競

詠擣衣

足傷金管遽多愴緹光促露團池上紫風飄庭裏綠下
機驚西眺鳴砧遽東旭芳汗似蘭湯雕金辟龍燭散度

廣陵音捺寫漁陽曲別鶴悲不已離鸞斷還續尺素在
魚腸寸心憑鴈足

與司馬治書同聞隣婦夜織

洞房風已激長廊月復清
藹藹夜庭廣飄飄曉帳輕
雜聞百蟲思偏傷一鳥聲
鳥聲長不息妾心復何極
猶恐君無衣夜夜當窻織

為人述夢

工知想成夢未信夢如此
皎皎無片非的一皆是以

親芙蓉褥方開合歡被雅步極嬌妍含辭恣委靡如言
非倏忽不意成俄爾及寤盡空無方知悉虛詭

侍宴景陽樓

金鋪爍可鏡桂棟儼臨雲沾觴均飲德服道驗朝聞詎
論禹無間非恥堯為君小臣亦何者短翮屢追羣

春日寄鄉友

旅心已多恨春至尚離羣翠枝結斜影綠水散圓文戲
魚兩相顧遊鳥半藏雲何時不憫默是日最思君

夜愁示諸賓

簷露滴為珠池水合成璧萬行朝淚瀉千里夜愁積孤
帳閉不開寒膏盡復益誰知心眼亂看朱忽成碧

送殷何兩記室

掩袖出南浦驅車送上征飄飄曉雲駛漾漾旦潮平不
肖余何惜無貲爾勿輕倘有還書便一言訪死生

春閨怨

愁來不理鬢春至更攢眉悲看蛺蝶粉泣望蜘蛛絲月

映寒蛩得風吹翡翠帷飛鱗難託意駛翼不銜辭

秋閨怨

斜光隱西壁暮雀上南枝風來秋扇屏月出夜燈吹
深心起百際遙淚非一垂徒勞妾辛苦終言君不知

詠寵姬

及君高堂還值妾妍妝罷曲房褰錦帳迴廊步珠屐
玉釵時可挂羅襦詎難解再顧連城易一笑千金買

在王晉安酒席數韻

窈窕宋華容但歌有清曲轉盼非無以斜眉幸相矚詎
減許飛瓊多

玉臺作絕

勝劉碧玉何因送款款半飲杯中醪

為人寵姬有怨

可憐獨立樹枝輕根易搖已為露所挹復為風所飄錦
衾襍不開端坐夜及朝是妾愁成瘦非君重細腰

為姬人自傷

自知心裏恨還向影中羞迴持昔慊慊變作今悠悠還
君與妾扇

一作釵

歸妾奉君裘斷弦猶可續心去最難留

為人有贈

碧玉與綠珠張盧復雙女曼聲古難匹長袂世無侶似
出鳳凰樓言發瀟湘渚幸有褰裳便含情寄一語

見貴者初迎盛姬聊為之詠

久想專房麗未見傾城者千金訪繁華一朝遇容冶家
本薊門外來戲叢臺下長卿幸未匹文君復新寡

傷乞人

少年空扶轍白首竟填溝葦席何由足菽藿不能周自

顧非好乞行且欲包羞勞君款曲問冒此殷勤酬

春思絕句

雪罷枝即青冰開水便綠復聞黃鳥聲全作相思曲

為徐僕射妓作

日晚應歸去上客強盤桓稍知玉釵重漸見羅襦寒

漢魏六朝百三家集卷九十二

欽定四庫全書

漢魏六朝百三家集卷九十三

陸倕集題詞

陸佐公為任樂安小友聲譽日進因作感知已
賦投贈序懷後奉命出淮泗以詩代書寄京邑
僚友劉兄殷弟諸子戚戚漼然于李郭同舟潘
夏方駕余每讀之未嘗不重其篤友生厚朋亞
也漏刻石闕二銘見美高祖勅稱佳作昭明宴

闡思舊詩云佐公持文介才學罕為儔既沒元
帝為其墓銘曰詞鋒颯豎逸氣雲浮一人之身
榮知三主亦云遇矣南國興運敦尚詩書梁武
起自文人尤勤氣類曲水清漳同遊並唱當時
作者但患無才爾長卿凌雲孟陽劒閣寧多慕
哉陸集二十卷不能盡見茲所輯錄皆麗而能
則斯人也斯文也生有蘭臺之聚死傳青鏤之
管即謂至今存可也

目錄

賦

感知已賦

思田賦

賦體

表

為豫章王慶太子出宮表

除詹事表

拜吏部郎表

為王光祿轉太常讓表

為張繡謝兄尚書謚靖子表

章

授潯陽太守章

教

為豫章王拜後赦教

未至潯陽郡教

又

書

與徐僕射薦沈峻書

答釋法雲書

啟

為張侍中謝啟

為息續謝勅賜朝服啟

遷吏部郎啟

謝勅使行江州事啟

銘

新漏刻銘

石闕銘

螽杯銘

碑

天光寺碑

墓銘誌

誌法師墓誌銘

祭文

釋奠祭孔子文

請雨賽蔣王文

詩

和昭明太子鍾山解講

以詩代書別後寄贈京邑僚友

贈任昉詩

漢魏六朝百三家集卷九十三目錄

欽定四庫全書

漢魏六朝百三家集卷九十三

明 張溥 輯

陸倕集

賦

感知已賦

夜申旦而不寐獨匡坐而怨咨命僕夫而夙駕指南館而為期學窮書府文究辭林既耳聞而存口又目見而

登心似臨淄之借書類東武之飛翰軫工遲於長卿踰
巧速於王粲固乃度平子而越孟堅何論孔璋而與公
幹或欲涉其涯溪求其界畔則浩浩港港彪彪泚泚譬
長鋏於鞘中若龍淵與蜀漢濟濟冠蓋初初雋逸有竊
風以味道咸交臂而屈膝或望路以窺門空升堂而入
室彼春蘭及秋菊尚蕪絕於衆芳矧重仁與襲義信遼
遼兮未央言追意而不逮辭欲盡而復忘竊仰高而希
驥忽脂車而秣馬既一顧之我隆亦東璧之余假似延

州之如舊同伯喈之倒屣附蒼蠅於驥尾託明鏡於朝
光謂虛無而為有布籍甚於游揚於是柔條颯其成勁
白露變而為霜歲忽忽而邁盡憂與愛兮未忘聚落莖
於虛室聽羈雀於枯楊怵鬱悒其誰語獨撫抱而增傷
託異人以蠲憂賴奇文而愈疾索黃瓊之寄居造安仁
之狹室車出門其已歡無論銜杯與促膝譬鄒子之喏
松故未寒而能慄徒納壤以作高漏吞舟而為網值墨
子之愛兼逢太丘之道廣陪九萬以齊征激三千而同

上識公沙於杵臼拔孝相於無名非夫人之為感孰云
感於余情指北邙以作誓期鬱鬱於佳城

思田賦

歲聿忽其云暮庭草颯以萎黃風颺颺以吹隙燈黯黯
而無光獨展轉而不寐何增歎而自傷於是跼蹐徙倚
顧景興懷魂恍恍以至曙綴予想於田萊彼五畝其馬
在乃爰泊乎江隈出郭門而東驚入淑浦而南迴爾乃
觀其水陸物產原隰形便林藪挺直丘陵帶面臨九曲

之廻江對千里之平甸風去蘋其已開日登桑而先見
聽啁哳之寒雞弄差池之春燕臨場圃以築館對櫺軒
而鑿池集游泳於階下引朝派於堂垂瞻巨石之前却
玩激水之推移雜青莎之霍靡拂細柳之長枝感風燭
與石火嗟民生其如寄苟有胸而無心必行難而言易
幸少私而寡欲兼絕仁以棄智忽學步而學趾又追飛
而厲翅瞻鹿苑而竊高仰疆臺而慕義歷四時於逝水
馳三稔於申臆望歸流而載懷情鬱挹其何寘

賦體

奉欽明之睿后沐隆平之玄化參振鷺之充庭侍長徒
之曾舍冀無恨於終南豫告成於芝駕雖就列而陳力
終胡顏於長夜

表

為豫章王慶太子出宮表

臣聞周固本支寔資明兩漢啟磐石必係元良所以闡
弘祚鼎光崇守器伏惟皇太子道契生知照均天縱不

藉審諭之功無待溫文之輔而冬書秋記夙表睿資春
誦夏絃幼彰神度雖復直門守令長壽察微魏贊多容
漢稱寬博不足以連輝茂則匹景今圖甲觀惟新桂宮
告始朱班徙次翠蓋移陰華裔式瞻人祇蹈舞

除詹事表

中陽白水徒庇微軀送珥抱薪未輦成績陳席不棄故
劍無遺遂宣時髦升降清顯尊官厚秩無因而至陋巷
簞門爵成爽塏儲端華重實異恒司南章馬宮已擇儒

雅實嬰許商爰取姻戚自茲已降名器日隆歷選才賢
若何叨越

拜吏部郎表

銓衡庶品歷選賓寮阮咸貞素屢薦未登陸亮忠心裁
居拜職自非季重清識李穀恬正則何以區分管庫式
鑒胥史

為王光祿轉太常讓表

昔者楚德方盛孫叔濯衣漢道克隆王陽結綬故拜命

無辭受爵不讓况宗卿清重歷選所難漢晉以降莫非
素範辭爵則桓郁張奮讓封則丁鴻劉愷潘尼之文雅
深純華表之從容退默自此迄茲風流繼軌以臣况之
曾無等級

為張纘謝兄尚書謚靖子表

亡兄夙構皇慈早邀靈慶立言著績未酌天寵門衰祚
寡遽辭昌運拊心摧恨私懷罔極日月告時幽埏浸遠
王人猥集佳冊光臨榮溢里庭恩深松檟

章

授潯陽太守章

鏤冰雕脂不見大龍之象課虛叩寂寧聞駕辯之音徒
荷容蓋空班推擇不能使府庭生梓橫閣誦經俯睨朱
輜仰瞻繒蓋漏上嚴辨伏軾多慙

教

為豫章王拜後赦教

夫議獄緩死著在令圖疑罪惟輕聞之雅誥是以虞經

惻隱流涕冬決鍾意垂仁哀矜寒送吾以虛薄夙頒寵
章光宅襟險奄有全粵非有沛獻矜嚴空紆青組東平
智思徒舉赤帷思所以仰述皇猷導揚弘澤遵彼下車
譬茲解網

未至潯陽郡教

第五倫之臨會稽躬斬馬草鄧伯道之莅吳郡自運家
糧故能使吏作頌歌民胥興詠太守薄德謬叨龜組竊
願巴祗閣坐接客思匹吳隱被絮對賓常藥自隨式瞻

無遠單車入境竊所庶幾舊須發民治道及戍邏掄樵採諸如此類一皆省息

又

太守家本諸生伏膺典記光武靈臺之籍較涉根基張華聚土之書略見庭戶貴郡圖載具存方策按以山經參諸括象原野城寺宛在心目龍泉鶴嶺不易窮登所撰郡圖可勿親用公孫陞戟既似井蛙延壽執戈實同兒戲

書

與徐僕射薦沈峻書

五經博士庾季達湏換計公家必欲詳擇其人凡聖賢
可講之書必以周官立義則周官一書實為羣經源本
此學不傳多歷年世北人孫詳蔣顯亦經聽習而音革
楚夏故學徒不至惟助教沈峻特精此書比日時聞講
肄羣儒劉崑沈宏沈熊之徒並執經下坐北面受業莫
不歎服人無間言弟謂宜即用此人命其專此一學周

而復始使聖人正典廢而更興累世絕業傳於學者

答釋法雲書

辱告惠示至尊所答臣下審神滅論管者異學爭途孟子抗周公之法小乘亂道龍樹陳釋迦之教於是揚墨之黨舌舉口張六師之徒轍亂旗靡言神滅者可謂學僻而堅南路求燕北轅首楚以斯適道千里而遙聖上愍其迷途爰奮天藻鉤深致遠盡化知神俾此困蒙均斯水釋陳茲要道同彼月照弟子並以凡薄沾竊思紀

纓冕則天之朝，飡捉稽古之論，贊幸之誠，獨知踊躍猥
頒告逮，謹用書紳陸倕呈。

啓

為張侍中謝啓

陳力就列，不能者止。實欲強飯據鞍，自窮心力。濡足摩
頂，少報私徒。課虛無空，延鐘箭不悟爰降曲慈。復叨
清顯職司，近叨任掌總綸。魏選異才，漢求高德。官次恪
居，鮮非民譽。仰瞻內省，無一可階。

為息纘謝勅賜朝服啟

玄冕素帶出自禁財朱紱青緇隆於皇府輝燭鄰黨震耀街衢姻族移聽朋儕改矚非臣隙弱所能陳報

遷吏部郎啟

臣器均濩落材同擁腫效非積山勤乖附地自叨榮秩列裁移氣序而坐延曲私遂被洪造自非割蚌識珠覩石知玉寧可以獲名理俗見操就教

謝勅使行江州事啟

封畛遐曠，厖井奧實。陸海神臯，偏屬茲境。兼以茂親明德，維翰作鎮。宣述條教，匡贊盛猷。自非問望，兼逢寧可擢膺嘉舉。

銘

新漏刻銘

夫自天觀象，昏旦之刻未分。治厯明時，盈縮之度無準。挈壺命氏，遠哉義用。揆景測辰，徼宮戒井。守以水火，分茲日夜。而司厯亡官，疇人廢業。益陬殄滅，攝提無紀。衛

宏載傳呼之節較而未詳霍融叙分至之差詳而不密
陸機之賦虛握靈珠孫綽之銘空擅崑玉弘度遺篇承
天垂旨布在方冊無彰器用譬彼春華同夫海東寧可
以軌物字民作範垂訓者乎且今之官漏出自會稽積
水違方導流乖則六日無辨五夜不分歲躔閼茂月次
姑洗皇帝有天下之五載也樂遷夏諺禮變商俗業類
補天功均柱地河海夷晏風雲律呂坐朝晏罷每旦晨
興屬傳漏之音聽雞人之響以為星火謬中金水違用

時乖啟閉箭異錙銖爰命日官草創新器於是俯察旁
羅登臺升庫測于地四參以天一建武遺蠹歲和餘舛
金筒方圓之制飛流吐納之規變律改經一皆懲革天
監六年太歲丁亥朔十六日壬寅漏成進御以考辰正
晷測表候陰不謬圭撮無乖黍累又可以校運算之睽
合分天地之邪正察四氣之盈虛課六律之疎密永世
貽則傳之無窮赫矣煥乎無德而稱也昔嘉量徵物盤
盂小器猶且昭德記功載在銘典况入神之制與造化

合符成物之能與坤元等契勲倍楹席事百巾机寧可
使多謝曾水有陋昆吾金字不傳銀書未勒者哉乃詔
小臣為其銘曰

一暑一寒有明有晦神道無跡天工罕代乃置挈壺是
惟熙載氣均衡石晷正權槩世道交喪禮術銷亡遽遷
水火爭倒衣裳擊刁舛次聚木乖方爰究爰度時惟我
皇方壺外次圓流內襲洪殺殊等高卑異級靈虬承注
陰蟲吐喙倏往忽來鬼出神入微若抽繭逝如激電耳

不輟音眼無留眄銅史司刻金徒抱箭履薄非兢臨深
固戰授受靡謬登降弗爽唯精唯一可法可象月不遁
來日無藏往分似符契至猶影響合昏暮卷藁莢晨生
尚辨天意猶測地情況我神造通幽洞靈配皇等極為
世作程

石闕銘

昔在舜格文祖禹至神宗周變商俗湯黜夏政雖格命
殊乎因襲揖讓異於干戈而晷緯冥合天人啟慧克明

峻德大庇生民其揆一也在齊之季昏虐君臨威侮五行怠棄三正刑酷然炭暴踰膏柱民怨神怒衆叛親離踏地無歸瞻烏靡託於是我皇帝拯之乃操斗極把鈞陳翼百神提萬福龍飛黑水虎步西河雷動風驅天行地止命旅致屯雲之應登壇有降火之祥龜策協從人祇響附穿胸露頂之豪箕坐推髻之長莫不援旗請奮執銳爭先夏首憑固庸岷負阻協彼離心抗茲同德帝赫斯怒秣馬訓兵嚴鼓未通凶渠泥首弘舸連軸巨艦

接艦鐵馬千羣朱旗萬里折簡而禽廬九傳檄以下湘
羅兵不血刃士無遺鏃而樊鄧威懷已黔底定於是流
湯之黨握炭之徒守似藩籬戰同枯朽革車近次師營
商牧華夷士女冠蓋相望扶老攜幼一旦雲集壺漿塞
野簞食盈塗似夏民之附成湯殷士之窺周武安老懷
少伐罪弔民農不遷業市無易賈八方入計四隩奉圖
羽檄交馳軍書狎至一日二日非止萬機而尊嚴之度
不詭於師旅淵默之容無改於行陣計如投水思若轉

規策定帷幄謀成几案曾未浹辰獨夫授首乃焚其綺
席弃彼寶衣歸璇臺之珠反諸侯之玉指揮而四海隆
平下車而天下大定拯茲塗炭救此橫流功均天地明
並日月於是仰協三靈俯從億兆受昭華之玉納龍叙
之圖類帝裡宗光有神器升中以祀羣望攝袂而朝諸
夏布教都畿班政方外謀協上策刑從中典南服緩耳
西羈反舌劍騎穹廬之國同川共穴之人莫不屈膝交
臂厥角稽顙鑿空萬里攘地下都幕南罷鄣河西無警

於是治定功成邇安遠肅忘茲鹿駭息此狼顧乃止六
樂治五禮改章程創法律置博士之職而著錄之生若
雲開集雅之館而款關之學如市興建庠序啟設郊立
一介之才必記無文之典咸秩於是天下學士靡然向
風人識廉隅家知禮讓教臻侍子化洽期門區宇又安
方面靜息役休務簡歲阜民和厯代規模前王典故莫
不斐夷翦截允執厥中以為象闕之制其來已遠春秋
設舊章之教經禮垂布憲之文戴記顯游觀之言周史

書樹闕之夢北荒明月西極流精海岳黃金河庭紫貝
蒼龍玄武之制銅爵鐵鳳之工或以聽窮省寃或以布
治懸法或以表正王居或以光崇帝里晉氏寢弱宋厯
威夷禮經舊典寂寥無記鴻規盛烈湮沒罕稱乃假天
闕於牛頭託遠圖於博望有欺耳目無補憲章乃命審
曲之官選明中之士陳圭置臬瞻星揆地興復表門草
創華闕於是歲次天紀月旅太簇皇帝御天下之七載
也構茲盛則興此崇麗方且趨以表敬觀而知法物觀

雙碣之容人識百重之典作範垂訓赫矣壯乎爰命下
臣式銘盤石其辭曰

惟帝建國正位辨方周營洛汭漢啓岐梁居因業盛文
以化光爰有象闕是惟舊章青蓋南泊黃旗東指懸法
無聞藏書弗紀大人造物龍德休否建此百常興茲雙
起偉哉偃蹇壯矣巍巍旁映重疊上連翠微布教方顯
浹日初輝懸書有附委篋知歸鬱嶕重軒穹隆反宇形
聳飛棟勢超浮柱色法上圓制摸下矩周望原隰俛臨

烟雨前賓四會却背九房北通二轍南湊五方暑來寒
往地久天長神哉華觀永配無疆

蠡杯銘

用邁羽杯珍踰渠碗實同蠡測形均撲滿伊我疲病獨
居無伴所不此挹誰誚誰緩

墓誌銘

誌法師墓誌銘

法師自說姓朱名寶誌其生緣桑梓莫能知之齊故特

進吳人張緒興皇寺僧釋法義並見法師於宋太始初
出入鍾山遂來都邑年可五六十歲未知其異也齊宋
之交稍顯靈迹被髮徒跣負杖挾鏡或徵索酒肴或數
日不食預言未兆懸識他心一時之中分身數處天監
十三年即化於華林門之佛堂先是忽移寺之金剛像
出置戶外語僧衆云菩薩當去爾後旬日無疾而殞沉
舟之痛有切皇心殯葬資須事豐供厚望方墳而隕涕
瞻白帳而拊心爰詔有司式刊景行辭曰

欲化毗城金粟降靈猗歟大士摧迹帝京緒胄莫詳邑
居罕見譬彼涌出猶如空現哀茲景像愍此風電將導
舟梁假我方便形煩心寂外荒內辯觀往測來覩微知
顯動足墟立發言風偃業窮難詔因謝弗援慧雲晝歇
慈燈夜昏

碑

天光寺碑

法雲旦聚則浸潤被乎重沙慧日晨登則暉光燭於有

項皇帝乃把神珠握靈鏡擊天鼓撞地鐘驅日月之師
勒星辰之陣九流外藉五明內興烏策餘文龍宮遺教
莫不神遊房奧跡徧門墻思洞希微言窮名象珉陞凌
虛瓊籬鬱起可使龍城愧飾雁塢慙珍日宇奪暉月宮
掩麗簪者姬水壽立載紀山川之目丹陵負夏僅傳鄉
黨之名歌酒故邑賜復窮乎身世壘簏舊里高會止於
當年銘曰

被物如露偃民猶草解髻傳珠抽衣受寶化違宅火功

超河岸捨我神居興茲靈館八襲豐殿四柱高廊並陳
金壁旁達玉箱從橫雜樹間厠衆芳

祭文

釋奠祭孔子文

於惟上德是曰聖真克明克峻知化窮神研幾善誘藏
用顯仁利同道濟成俗教民道尊功倍德溥化光離經
辨志濟濟洋洋

請雨賽蔣王文

陸周祚肩鍾嶽降精聰明正直得一居貞無方無體不
疾不行化馳九縣位冠百靈東掩屢憊西郊已戢偶龍
矯首泥人鶴立神聽孔殷靈應揮霍倏覩翻伊俄聞倒
洛樂周祈畢恩洽酒闌靈談抗袖鬼笑投枰推茲且引
於萬斯歡

詩

和昭明太子鍾山解講

終南鄰漢闕高掌跨周京復此虧山嶺穹窿距帝城當

衢啟珠館臨下搆山楹南望窮淮淑北眺盡滄溟步簷
時中宿飛階或上征網戶圖雲氣龕室畫仙靈副君憐
世網廣命萃人英道筵終后說鑾轡出郊坰雲峰響流
吹松野映風旌睿心嘉杜若神藻茂琳瓊多謝先成敏
空頒後乘榮

以詩代書別後寄贈京邑僚友

余本水鄉士閉門江海隅時逢世道泰蹇足步高衢名
成宦雖立效微功日踈入仕乘肥馬出守擁高車關門

遊昔吏遷亭有故書江派資賢牧宗英出建旗不勞王
布鼓無賴露田車弼政非責實求名已課虛長卿病猶
在脩齡疾未祛詎知亭長肉寧挂府丞魚不能未能止
內訟慚諸已僂俛從王事纔舟出淮泗朋故遠追尋曠
宿清江陰明旦一分手翻飛各異林歸舟隨岸曲猶聞
歌棹音行者日超遠誰見別離心夕次洲岸明登慈
姥岑水流多迴復余歸良未尋江關一作中寒事早夜露
傷秋草心屬姑蘇臺目送邯鄲道葭葦日蒼蒼親知慎

早涼劉兄消渴病休攝戒無良殷弟癩眩疾行止避風

霜劉侯有餘洽宜餌陟

一作休

釐方伏子多風咳門冬幸

易將率更愛雅體體弱思自強吏曹勉玉潤諷議勗金
相比部多暇日奚用肆龍章建德何為者無墮無人鄉
記室朋從暇露蛄附行商議曹坐朝罷尺板嗣徽芳雙
栖成獨宿俱飛忽異翔眷言思親友沉思結中腸追惟
疇昔時朝府多歡暇薄暮塵埃靜飛蓋遙相迓李郭或
同舟潘夏時方駕娛歡追美景數文永清夜促膝豈異

人戚戚皆朋

一作姻

姬今者一乖離
漼然心事差山川望


猶近便似隔天涯
玉躬子加護昭質
余未虧八行思自
勉一札望來儀

贈任昉詩

昉為御史中丞後進皆宗之時有彭城劉孝
綽劉苞劉孺吳郡陸倕張率陳郡殷芸沛國
劉顯及到溉到洽車
軌日至號曰蘭臺聚

和風雜美氣下有真人遊
壯矣荀文若賢哉陳太丘
今則蘭臺聚萬古信為儔
任君本達識張子復清脩
既有

絕塵到復見黃中劉



漢魏六朝百三家集卷九十三